

Keunikan durian sompo Lenggeng



Zain menyusun buah durian yang dijual di gerainya di Kampung Rawa, Lenggeng.

Memiliki fizikal duri panjang, bau lebih kuat dan rasanya seperti tapai

Oleh SYAMILAH ZULKIFLI

SEREMBAN

D urian sompo atau digelar sebagai durian 'samsu' yang terdapat di Kampung Sompo, Lenggeng, di sini mempunyai keunikan tersendiri dengan duri yang agak panjang, bau yang lebih kuat dan rasanya dikatakan seperti tapai.

Pengusaha kebun durian, Datuk Zain Maarof, 57, berkata, durian itu merupakan antara spesies durian hutan dan hanya individu tertentu menggemarinya kerana disifatkan sebagai unik.

Katanya, durian itu kini sukar ditemui dan beliau mengambil inisiatif menanamnya bagi mengelakkan ia pupus.

"Saya ada tujuh ekar (2.833 hektar) kebun durian yang

ditanam dengan 20 jenis durian dan salah satunya ialah durian hutan sompo.

"Tapi durian ini tak ramai yang tahu dan suka kerana bau dia kurang enak dan rasanya kurang mantap berbanding durian-durian lain," katanya kepada *Sinar Harian* pada Jumaat.

Menurutnya, bagi yang tidak biasa makan buah durian ini, ia boleh menyebabkan rasa khayal dan sebab itu ia digelarkan sebagai durian samsu.

Zain berkata, disebabkan pokok durian itu mempunyai imuniti yang kuat berbanding pokok durian biasa, ramai yang mencarinya untuk dijadikan sebagai pokok penanti.

MUSIM RAJA BUAH

"Biji durian itu nanti orang akan tanam dan apabila besar sedikit akan dikahwinkan dengan pokok durian lain bagi mendapatkan pokok yang lebih kuat.

"Soal penjagaan pokok durian sompo ini pun lebih mudah berbanding pokok durian lain," katanya.

Beliau yang mempunyai gerai menjual durian di Kampung Rawa, Lenggeng berkata, walaupun tidak ramai yang suka akan durian sompo, namun ia tetap mendapat permintaan.

Katanya, pelanggan perlu membuat tempahan awal buah itu yang dijual dengan harga RM15 sekilogram.

"Ibu buah durian sompo ini

pula agak tebal dan berwarna kuning. Bunga durian juga berbeza dengan durian lain kerana ia berwarna merah.

"Itulah uniknya durian sompo. Setakat dalam pengetahuan saya, terdapat lebih 100 jenis durian yang didaftarkan," kata-

Peminat durian hutan, Ishak Tamyes, 60, berkata, buah itu mempunyai rasanya tersendiri yang membuatkan peminat sangat menunggu untuk merasainya.

"Saya sudah menempah beberapa hari sebelum ini untuk mendapatkan durian hutan ini.

"Tidak semua orang suka durian hutan sebab rasa dan bau dia tetapi kalau yang minat dia akan cari," katanya

